

Kolinta yaaba Tilieli

¹ Mini polo, Jesu Kilisiti tondo kelima U tienu yanbuama po, leni ti kpiilo Timote, ti taani diani yinba Utieno nitanli yaaba n ye Kolinta, leni Utieno nigagidinjanba yaaba n ye Akayi diema nni kuli. ² Utieno ti ba leni Jesu Kilisiti ḷanbili leni Oyanduanma n yaa ye leni yi. ³ Utieno n baa ti kpiagidi wani yua n tie Jesu Kilisiti ba, mi ninñingbadima ba leni i baagi kuli yaa ba. ⁴ Wani n baagiti falabuolu kuli n ni ke ti moko n tua baagi kaaba yaaba n ye fala tiamo nni leni tin ba yaa baagi Utieno kani . ⁵ Nani tin laadi yaa falaciamo kelima kilisiti po n yaba maama yeni, tin baadi yaa baagi Kilisiti kani moko yabi ki da yene. ⁶ Ti yaa laadi fala li tie kelima ti bua yin paagi yi ba mi tindima ya sanun ni, ti yaa baadi yi baagi li tie ke yi moko n ba i baagi, li tie yin baa li juunli li yaa tie ke yi moko laa tin laadi yaa fala. ⁷ Ti pala pa yi po boncianla kelima yi yaa tuo fala, i baagi moko baa tua yi biinu . ⁸ N kpiiba li tie ke tii bua wuoni li ba kuli leni tin laa yaa fala biado Asi diema nni. laa fala biado den kpiagi ki pendi ti fidu banlu hali ke ti den taama ke ti kaa pia miali. ⁹ Ti den nua cain nani bi tianba, ke ti kuumi yogunu pundi hali ke ti den bangi ke ti kan yaa dugi ti yucela po ka, ama ti baa yaa dugi Utieno po wan yua fiindi a tinkpila. ¹⁰ Wani n den faabi ti, ki go baa faabi leni laa kuubuolu. ti tama ke O go baa faabi ti. ¹¹ Yinba yi moko n

yaa todi ti i jaandi nni, yaa niba kaa wa tuondi Utienu leni O ḥambili ti po kelima niba boncianla den jandi ti po . ¹² Kelima tin pia yaa jigidi tie ke ti pala siedo doagidi ke ti ye ḥanduna nni leni yaa tagu n gagidi leni yaa yantugupiengu n ḥani Utienu kani. yaala n cie mo n tie ke ti tagu den tie yene yi siiga. tii den pia laa taginamu kelima o nisaalo yanfuoma po ka, ama li tie kelima Utienu ḥambili po. ¹³ Tii diani yi po bontoala kaa tie yin cogi yaala ki go ban yaala. n sugini yin bandi la ki pugini hali ki ban bandi cain. ¹⁴ Nani yin bandi waamu maama, ke ti yi jigidi nani yi moko n ba ti tua maama O Diedo Jesu cuama daali . ¹⁵ Min den bandi cain ke li baa tie yene yi po, lan yaa po n den jagi ke n baa cua i kani lani n tie yin baa li ḥambili ki pugini. ¹⁶ N bi bua ki tagini yi kani ki yuandi ki suagi Maseduana diema nni. n yaa gedi Maseduana ki guani yi kani, yin ciani nni min gedi Jude diemanni . ¹⁷ Min den bua ki tieni maama yeni, naani li tie ke mii nuanli la bonmoanli bii? bi min jagi maama yeni tie nisaali yanjagili yo? ke n niini pia yantiana lie «nm» leni «aa» a. ¹⁸ U tienu tie siedi ke tin den waani yi yaa maama yeni, naa den tie «nm» ki go tie «aa a». ¹⁹ Mini leni Silivin leni timote n den wangti yi yua yaa maama yeni lan tie Jesu Kilisiti Utienu bijua naa tie «nm» ki go tie «aa a». ama «nm» bebe n ye O kani. ²⁰ Kelima Utienu ḥoanianu kuli «nm» bebe n ye. wan yaa po yo ke ti gani «amina» O yeli kpiagidi po . ²¹ Yua n teni ke tinba leni yinba se ke pa Kilisiti nni tie Utienu wani yua n go gandi ti. ²² O go den tieni ti po O maalima, yaa maalima n tie Utienu Fuomi

yua ti pala nni . ²³ Utienu tie n siedo, ke mii pua faama li yaa tie moamoani won ta n miali; mii den guani ki gedi Kolinta, kelima mii den bua ki cuagi yi. ²⁴ Laa tie ke tinba gobidi yi dandanli ka, ama li tie ki todi yi yin yaa pia li pamanli kelima yi se ke li pa li dandanli nni .

Dianciamou 2

¹ Lan wani n den jagi n yaa ba, ke n kan gedi i poo leni li pabili. ² Kelima n yaa biidi i pala, yme n baa fidi ki mangi n pali? li yaa tie min biidi yinba yaaba yaa pala yaa ka . ³ N den diani yi laa tili kelima mii bua n yaa cua yi kani yi pala n biidi, yinba yaaba ba mangi n pali. n pia laa dugidi yi kuli po kelima n pamanli tie yi moko yaale. ⁴ Li den tie leni li pabiili, leni li pabuanli ke n den diani yi, leni ti ninsiikankaadi; laa tie ke n den bua yi pala n biidi ka, ama n den bua yin bandi yin pia yaa buacianma yi po . ⁵ Yaa nilo n tieni yaali n cuani li pabiili, min bebe yaa pali ka ke o biidi, ama o biidi yi kuli pala die min da yedi yi kuli, ki da maadi ki pendti ama min yedi yi siiga bi tianba. ⁶ Niba boncianla n den funi leno ki go paadi ki sieno yeni, li dagidi. ⁷ Li pundi yin pa o sugili ki go baagi o ke li pabiidikandi kaali n da ti je o. buama o po . ⁸ Lan wani n miadi yi ke yin doagidi waani yi buama o po. ⁹ Yaali n teni ke n go den diani yi n tie ke n bua ki biigi bandi yi yaa pia mi tuoma li bonli kuli nni . ¹⁰ Yin tieni yua yaa po sugili kuli n moko puni sugili. min tieni yaali po sugili, li yaa tie ke n pia min baa tieni yaali po sugili kuli n baa

pa sugili Kilisiti nintuali kelima yi yaa po. ¹¹ Ki da cedi rutaani n ba u folu ki fidi ti kelima tii sundi o yan jaga po. ¹² Min den pundi Tulowasa dogu nni kelima Kilisiti labaali njamo po; baa ke O Diedo den luodi n po u sanu li poo, mii den pia yanduama kelima min den pundi li po mii laa n kpiilo Tita. ¹³ Lan yaa po n den cabi Tulowasa yaaba ki den gedi Maseduna. ¹⁴ Ti tuondi U tienu wani n teni yogunu n kuli ke ti paadi Jesu Kilisiti niini. ki go teni ke ti yadi i kaankuli o bandima yaa nulu manu. ¹⁵ Ti tie Utienpo yaa nuulimanu n ña Kilisiti nni yaaba n ba mi tidima sanu leni yaaba n ye mi bodima sanu nni. ¹⁶ Bitianba po laa nuulu tie mi kuuma yaa nuulu yu n kpendi nni mi kuuma; bi tianba mo li miali nuulu ki baa cuani li miali. njme n dagidi ki ba soani laa tuonli buolu? ¹⁷ Ti naa lebidi U tienu maama nani bi niba boncianla n tiendi maama yeni ama ti maadi leni payenli yaa maama n ña Utienpo kani ke ti maadi Jesu Kilisiti nni wan Utienpo nintuali.

Dianciamou 3

¹ Naani ti baa go guani ki wani ti yula yi kani bii? bi yi bua yaa tila n baa wani yi tin tie yaaba nani bitianba n tiendi maama. ² Yinba n tie ti tila, ya tila n diani ti pala nni ke bi niba kuli cogi ki go bani. ³ Li doagidi bi niba kuli po, ke yi tie Kilisiti tili, ti tuona n diani ya tili yaa po. laa tili naa den diani leni tidianñima ka, ama leni U tienu yua n fo yaa fuoma. ke li naa go tie a tana yaa walimu po ka ama ti gbanandi yaa walimu po lan tie ti pala nni ⁴ Ti pia laa dugidi U tienu

nintuali kelima Jesu Kilisiti po, ⁵ Laa bua ki yedi ke ti baa fidi ki tieni bonli ba leni ti yucela fiduka, ama tin fidi yaali kuli ñani U tienu kani. ⁶ O go den teni ke ti fidi ki tua o ñantaadi paano yaa naacenba, ki laa ñua leni yaa tili n diani ka ama leni mi fuoma. kelima yaa balimaama n diani, kpendi nni mi kuuma ama mi fuoma puuni limiali . ⁷ Yaa balimaama n kpendi nni mi kuuma yaama ke bi den diani a tana po, yaa den pia ti kpiagidi hali ke Isalele yaaba kan den fidi ki diidi Musa kelima yaa kpiagidi n ye o nungi po, ba ke li tie yaa kpiagidi n baa pendi, ⁸ Yin bandi cain ke Utienu Fuoma yua n soani yaa tuonli pia ti kpiagidi ki cie . ⁹ Li balimaama tuonli yaali n den kpendi nni li bujia leni u cuonu yaa den pia ti kpiagidi, li moamoansaali yaa maama tuonli pia ti kpiagidi bonjanla ki cie. ¹⁰ Lan yaa po, yaali n den pia ti kpiagidi naa go den tie pu kuli kelima yaali n ye moala pia ti kpiagidi bonjanla ki cie. ¹¹ Yaali n den tie bonpendi kaala yaa den pia ti kpiagidi yeni, yaali n ye yaa yogunu n ki pia gbenma n pia ti kpiagidi ki cie . ¹² Nani tin pia laa suginma buolu yeni, ti tuuni leni ti dugidi. ¹³ Ti naa tiendi nani Musa yua n den yen wagini o nunga kaa bua Isaleleeba yaaba n diidi o nunga yaali n ba juodi ki pendi . ¹⁴ Bi tua yanpiidanba kelima ba leni moala, laa kpali piikaabu baa ki piigi bi yama bi yaa cogi o ñantaadi kpelo diani. li kan pigidi bi po li yaa tie Kilisiti nni yaa ka. ¹⁵ Hali yen dinla bi cogi Musa tili, li cabili yen baa pi bi pala. ¹⁶ Ama hali bi tuo ki lebidi bi pala ki daani O Diedo baa pigidi . ¹⁷ Na kanba lan yedi

O Diedo yeni, li bundi Fuoma Yua yo. kelima nan kani ke O Diedo Fuomi ye mi faabima moko ye lan kane. ¹⁸ Tinba yaaba yaa nunmu n pigidi, tin nuanli leni ti pagidi nani ki madiidi nni yeni O Diedo kpiagidi, ti baa sua ke ti nunmu kuli tie nani wani yeni, kpiagidi ki tu kpiagidi .

Dianciamou 4

¹ Lan yaa po nani won puogiti laa tuonli, kelima o ninñingbadima po yeni, ti kan cedi ti gbanu n yualigi. ² Ti yie yaali tiendi i ñasili nni ki tie fee bonla. tii tie nunfanbiadibu danba, tii go lebidi Utieno maama baa waamu. ama bi niba pala dua ti po kelima ti wangidi imoamoani Utieno nintuali . ³ Tin wangidi yaa labaali ñamo yaa duaga, o duaga yaaba bodi po. ⁴ A pajuaga danba po kelima tin ye yaa jamaano ne tienu juani bi yantiana kaa bua ban le Kilisiti yua n tie U tienu nannanli yaa labaali ñamo kpiagidi n ñani ki ñuliti maama . ⁵ Ti naa wangiti ti yaa yula maama ka, ama Jesu kilisiti ti Diedo yo ke wangidi. ti go yedi ti yula ke ti tie yi naacenba kelima Jesu po. ⁶ Kelima Utieno wan yua n yedi: mi yenyenma baa yendi li biigili nni, den teni ke mi yenyenma yendi ti pala nni ki bua, ke tin bandi wani Utieno kpiagidi n ñuliti maama Jesu Kilisiti nungi po . ⁷ Ti cuoni leni laa piama tinba yaaba n naani nni yaa tuonsuantiagu n tie tandi. ke laa paliciamu kpiagidi n da tie ti yu, ama U tienu yaa kpiagidi. ⁸ Lan yaa po, bi wangidi ti fala buolu kuli ama bi naa paadi ti; ki yagini ti yama, ama ti jigi naa cie; ⁹ Ti laadi fala, ama U tienu naa ñaa ti; bi yen guliti, ama ti yen fi; ¹⁰ O

yogunu kuli ti tugi Jesu kuuma ti gbanandi nni, lani n tie Jesu miali moko n doagidi ti gbanandi nni . ¹¹ kelima tinba yaabi n fo, o yogunu kuli ti ye mi kuuma nni kelima Jesu po; ke Jesu miali moko n doagidi ti gbanandi nni. ¹² Lan mi kuuma tuuni ti niini ama li miali moko tuuni ti niini . ¹³ Nani ti kuli n pia yantiayenli li dandanli nni nani lan diani maama: «n daani, lan yaapo yo ke n den maadi» ti moko daani lan yaa po yo ke ti maadi. ¹⁴ Yin bandi mani ke yua n fiini O Diedo Jesu bi tinkpiba siiga yeni, ba ti fiini ti moko leni Jesu ki teni tinba leni yinba n taani ki sedi o nintuali. ¹⁵ Yi yaa po n teni ke ti laadi lan kuli. ke U tienu ɔjanbili yaa yabidi pugidi lan teni bi niba boncianla moko, tuondi n yaabidi ki pugini U tienu kpiagidi po . ¹⁶ Lan yaa po n teni ke tii luo li papaali, kelima ba ti gbanandi yaa kpeligi ke ti gbamanu wadi, ti naano wani, daali ki tu daali yen pandi. ¹⁷ Kelima moala n po tin laadi yaa fala jenjenmu, ki tie pu, ti yaa biiga leni wan begin ti po yaa kpiagidi. ¹⁸ Ti nuni naa ma bi niba n nua yaali yaa po ka, ama yaala ke baa nua; kelima bi niba n nua yaala tie bonpendi kaala ama ban kan fidi ki le yaala lani n tie yaala n kan pendi fabada .

Dianciamou 5

¹ Ti bani ki tingi n po tin ye yaa gbanandi yaa niini yaadi n tie nani li gbandiel yeni yaa bodi, ti pia tanpoli po yaa dieli ke U tienu wani o yaaba n tagi yaali. yaa dieli n baa ye u yogunu kuli, o nisaalo n ki tagi yaali. ² Ti go ye leni li dunli laa gbandiel yaa niini kelima ti bua ki yie ti tanpoli

gbandieli. ³ Lan wani ti yaa yie tanpoli tiadi ti kan sua ti ye mubina . ⁴ Hali ti da ye ti naa gbanandi nni ti ye leni li dunli leni fala. laa tie ke ti bua ki yiedi tin yie yaa gbandiel ka, ama ti bua ki yie tanpoli yaali, lan tie yaali n fo n bolini yaali n kpe. ⁵ U tienu, wani O Yaaba n boginti laa bonli po, ki go kpa puni ti O Fuoma Yua, yuan tie tin baa ba yaala yaa bonciala . ⁶ Lan wani ti pala gbie leni ti dugidi, ki go bani ke ti yaa ye ti naa gbanandi nni ti ye ki fuagi leni O Diedo. ⁷ Kelima ti cuoni leni li dandanli yo, laa tie leni tin nua yaali ka. ⁸ Ti gbie leni ti dugidi ti go bi sugini ba ki ña yaa gbanandi n tiene yaa niini ki yaa ye leni O Diedo . ⁹ Lan yaa po, ba tin ye ti naa gbanandi nni bi, ti yaa di ye ti naa gbanandin nni, ti tiendi a nia ki bua O pali n yaa mani ti po. ¹⁰ Kelima tiladi, ti kuli baa fa ki sedi Kilisiti bujiali kaanu kani yua kuli n ga o tuonjama bi, o tuonbiadi panpani wan bi ye o gbanandi nni yaa yogunu . ¹¹ Nani tin pia O Diedo fangili maama yen, lan teni ke ti maadi ki bua ti maama n sii ki lebidi bi niba pala. U tienu bani yua kuli; yi moko yi pala nni yi bani tin tie yaaba. ¹² Tii wangidi ti yula yi kani, ama ti puni yi u sanu yin mangi yi pala ti po. lani n tie yin fidi ki guani ki lebidi yaaba n gbengidi bi yula len yaali n ye niini ki naa faami yaali n ye li pali nni . ¹³ Lan yaapo, n yaa tie nani yua n luo mi yama li tie Utienpo, n yaa go pia ma mo, li tie yi yaa po. ¹⁴ Kilisiti buama tiginiti. kelima ni yendo yaa kpe bi niba kuli po, li bundi ke bi niba kuli kpe. ¹⁵ O den kpe yua kuli po, lan tie yaaba n ye, n da ye bi yucela po ka ama ban yaa ye yua n den kpe, bi

po, ki guani ki fii bi tinkpiba siiga yaa po . ¹⁶ Lan wani ki cili leni moala tii go nua bi niba leni ti gbanandi nunnuanligu ka; ba ti yaa den bandi Kilisiti wan den ye ti gbanandi nni yaa yogunu, moala laa tie yen ka. ¹⁷ kelima o nisaalo ya ye Kilisiti nni, o tie tagipanma, li bonkpeli pendi, ke li bonli kuli tua bonpanla . ¹⁸ Lan kuli ñani U tienu kani, wan yua n teni ke ti guani mangi yeni O kelima Kilisiti yaa po. ki go puogiti yaa tuonli n tie, ke tin tua yaaba n baa teni ke bi niba n guani mangi leni O. ¹⁹ U tienu den ye Kilisiti nni ki den teni ke ñanduna guani mangi leni O. kaa coadi bi tuonbiadi; ki go den tieni ti ñoana nni O maama. ke tin yaa wangidi ya maama n ba teni bi niba n guani mangi leni U tienu . ²⁰ Lan wani, ti tie nani Kilisiti n dini yaa niba li bali; ke ti maama tie nani U tienu wani O yaaba n maadi ti ñoana nni ki tundi yi. ti miadi yi Kilisiti yeli nni guani mani ki mangi leni U tienu. ²¹ Kilisiti yua n kaa den bandi ti tuonbiadi, U tienu teni ke O tua tuonbiadi kelima tinba yaa po. lan tie Kilisiti yaa niini tin fidi ki baa U tienu moamoansaali.

Dianciamou 6

¹ Nani tin taa ki tuuni leni U tienu yeni, ti tundi yi, ke o ba kuli n da ga U tienu ñanbili paabu fanma. ² Kelima O yedi: li ñanbili yogunu n den guani ki lebidi ña miabu, mi faabima daali n den faabi ña. tii tua tantuudi kaali li ba kuli nni; ³ ke bi niba n da ba u folu ki sugi ki juagini ti tuonli . ⁴ Ama li bonli kuli nni ti yen moandi kaa pia o siedi ñamo, nani tin tie U tienu nacenbi yeni, li juunli boncianla o fala ciomo nni, ti yanyagidi

nni, mi luoma nni, ⁵ Ki juuni leni ti puadi nni, a kpaadidiena nni, ku fuugu nni, a tuonciama nni, mi duuanlima nni, mi ñoalolima nni kuli. ⁶ Ti moandi ki pia laa siedi ñamo leni ku yantugupiengu nni mi bandima nni, li juuli nni, mi ñanma nni, leni mi fuonjanma, leni mi buamoanma, ⁷ Ti go pia laa siedi ñamo kelima i moamoani maama po, leni U tienu paaliciaamu len mi teginma toatiadi tin moa leni yaadi, len tin moa ki gaani ti yula leni yaa toatiadi . ⁸ Ti go moandi ki laa siedi ñamo, ban kpiagidi ti naani leni ban fiagiti naani, ti pagidi leni ki faliga siiga, ki nua ti nani tuofaadanba ba leni tin tie moamoani danba. ⁹ Ki nua ti nani binilanba yeni ba leni ban banti; nani yaaba n ba kpe ama ti fo. ¹⁰ Bi nua ti nani yaaba ye li pabidili nni ama o yogunu kuli ti gbie leni li pamanli. nani a luoda yeni ama, ti teni ke niba boncianla tua piada. bi nua ti nani yaaba ki pia li ba ama, ti pia li bonli kuli . ¹¹ Yinba Kolinta yaaba, ti luodi ti ñoana ki maadi leni yi, ti luodi ti pala yi po tii wuoni yi li ba kuli. ¹² Ti naa luoni ti pala yi po, ama yinba, yi luoni yi yaa pala ti po. ¹³ N maadi yi nani n bila yeni, yi moko n luodi ki piagi yi pala ti po nani tin tieni yi po maama yeni . ¹⁴ Yin da pia u taayienu leni yaaba n kaa tie dandantieba, ki tugì yaa tugili n kaa tie yi yaali. kelima bee taayienu n ye mi teginma leni ti tuonbiadi siiga? bi, bee ñantaado ye mi yenma leni li biigili siiga? ¹⁵ Naani Kilisiti leni Beliali baa dagidi leni bi yaaba? ¹⁶ Be yaa taayienu n ye U tienu diegu leni Ibuli siiga. kelima ti tie Utienu yua n fo yaa diegu

yo; nani U tienu wani O yaa ba n yedi maama: n ba ya ye bi siiga ki go cuoni leni ba. N baa tie bi Tieu bi mo baa tie n niba . ¹⁷ Lan yaa po O diedi yedi: yin ña bi siiga ki paadi leni ba, yin da sii yaali joagini kuli lan tie min ga yi. ¹⁸ N baa tie yi ba, yi mo n tua N bijaba leni N bisiaba. O Diedo Upaaciamu kuli daano n yedi maama .

Dianciamou 7

¹ Lan yaa po, n bua kaaba nani tin pia laa ñoanianu yeni, tin yaa ye mi candijanma nni ki fuagidi ti yula leni yaali n ba joagini ti gbanandi leni ti yantiana kuli. ki juodi ti gagidijanma Utieu fangili nni . ² Yin pa ti mani u kaanu yi pala nni kelima ti naa biidi o ba kuli po, tii kuli o ba, tii go dini o ba kuli bonla. ³ N maadi yeni laa tie ke n bua ki jaligi yi ka, ama nani min den kpa yedi yi maama, lan tie miali nni bi kuuma nni; ⁴ N dugi yi po boncianla, n pia ti jigidi kelima yi po, ba o falaciamo siiga, ti gbie leni i baagi leni li pamancianli . ⁵ Moamoani, tin den pundi Maseduna ya yogunu tii ba fuodima baa waamu. ti den la fala buolu kuli. niini li moali, deeni mo i jeje. ⁶ Ama Utieu wani yua n bagidi ti, den baagi ti leni Tita cuama ti siiga. ⁷ Laa tie Tita cuama bebe ka, ama wani o yaa ba moko n den ba yaa baagi i kani. o den togidi ti yi yankuali, yi ninsiidi leni yi ñaniali n po, hali li pamancianli den yabidi n niini . ⁸ Ba leni min den biidi yi pala kelima min den diani yi po yaa tili yeni po. mii yedi n yaabi ña mii diani yi; ba yen laa Tili n biidi yi pala yogunu n ba waamu po yeni; ⁹ Moala n pali mangi, ki laa tie

kelima n biidi yi pala ka, li tie kelima laa pabiili cuani yi po mi lebidima. laa pabiili buolu dagidi Utieno po, lan wani tii biidi yi po li ba. ¹⁰ Kelima U tienu bua yaa pabiili buolu n baa cuani mi yanlebidima, yaa yanlebidimi n baa cuani mi tindima. lan wani ti kan yedi ti yaabi banii tii biidi yi pala. ama ɳanduna yaa pabiili wani yen cuani mi kuuma . ¹¹ Diidi mani ki le, laa pabiili yaali ke U tienu bua, n cuani yi po yaa tiginma yi niini. ki teni ke yi mia sugili, ke yi pala biidi li po ke ti jiwaandi cuo yi; ke yi go sugini ki lee nni leni li yankuali, ke yua n tudi n ga o tagili panpaani; li bonli kuli nni yi doagidi wani ke yii pia tagili ba kuli laa bonli yaa niini. ¹² Lan wani n den diani yi laa tili, laa tie yuan tieni yi tagili po ka, bi yua ke bi tudi o po ka, ama li tie ke n bua ki lee yi siiga yin pia yaa ɳaniali ti po U tienu nintuali . ¹³ Lan kuli den baagi ti, laa tie laa baagi bebe ka, ama ti pala go den mangi boncianla kelima ti den la Tita n pia ya pamanli kelima yi den duani o yama. ¹⁴ Baa leni min den pagi n yuli waamu kelima yi po Tita kani, mii la fee li yaa po, ama li doagidi ke min den pagi yi o kani maama yeni tie moamoani . ¹⁵ O yaa tiadi yi kuli n pia yaa tuoma, ke yi go den ga o cangu leni li fangili, leni mi digima; o buama yi po yabidi ki pugini. ¹⁶ N pali mani kelima li bonli kuli nni, n baa fidi ki dugi yi po .

Dianciamou 8

¹ Ti kpiiba n bua yin bandi U tienu ɳanibili n doagidi Maseduna jandiena yaaba po maama.
² Ba leni ban den la fala boncianla, bi den ye leni

li pamancianli. ba leni bi luokandi kaama kuli, bi den fidi ki puni mi todima bonjanla . ³ N tie bi siedo, bi den puni leni bi pala kuli nani yua kuli n fidi maama, ke li den pendi ki cie ba bi fidu bianu. ⁴ Bi go den mia ti leni mi tiginma ke tin tieni bi po li ḷjanbili ban moko n fidi ki todi U tieni ni gagidinjanba. ⁵ Bi den tieni ki cie ba tin den tama maama kelima bi den kpa puni bi yula O Diedo, ki den yuandi ki puni bi yula tinba leni U tieni yanbuama . ⁶ Lan wani, ti den mia Tita wan ḷjanbi ki dudi yaa tuonjanli ke o den cili yeni. ⁷ Nani yin ye liiga li bonli kuli nni maama yeni, yaalin tie yi dandanli nni, mi maama nni, mi bandima nni, li yankoaliali li bonli kuli nni, leni yi buama ti po, yin tieni ḷnania ki yaa go ye liiga laa tuonjanli yaa niini . ⁸ Laa tie ke n bili yi po ñoabonli ka, ama n togidi yi nitoaba n pia yaa yankoali. ki bua ki biigi ki lee, yi buama ya tie buamoanma. ⁹ Kelima yi bani ti Diedo Jesu Kilisiti ḷjanbili, wan yua n den tie piado, o den tua luodo kelima yi yaa po. lan tie O luoma, nni yin tua piada . ¹⁰ N wani yi min la maama li po; n la ke lani n dagidi leni yi. yinba yaaba n den kpa cili ki tendi yi todima. lan bebe ka, yi den pia laa yantiali hali jeli. ¹¹ Yin tieni ki dudi yin den cili yaa tuonjanli leni yaa yankoali ke yi den cili ki ba. ¹² Li yankoali yaa ye, li tie yaali n dagidi U tieni po. kelima o baa kuli kan fidi ki teni wan kaa pia yaala . ¹³ Laa tie ke n bua yin kpaadi yin pia yaala ka ki teni nitoaba; ama n bua li bonli kuli n yaa da leni li yala. ¹⁴ ke moala n po yin pia yaala ke li kandi n tua todima ban

luo yaala Ke ban moko n pia yaali ke li kandi
 n todi yi moko yin luo naani, lani n tie li bonli
 kuli n dagidi cain. ¹⁵ Nani lan diani maama: yua
 n wodi boncianla naa pia ke li kandi, yua mo
 n wodi waamu laa poadi o . ¹⁶ U tienu n baa i
 tuondi leni wan tieni Tita moko yaa pali nni laa
 tiginma yi po. ¹⁷ Kelima o den tuo ti miabu, leni
 li yankoali. leni o yantiaceli, o ñani ti kani ki baa
 gedi yi poo . ¹⁸ Ti soani o leni ti kpiilo yua ke bi
 niba kuli tendi o po o siedi a jandiena nni kelima
 wan tuuni yaa tuonjanli o labaanjamо wangimi
 po. ¹⁹ Wane ke a Jandiena go den gandi wan n tua
 ti yegini n lielo mi naa todima tuonli yaa sancenli
 nni. tin tiendi yaa tuonli kelima O Diedo yaa yeli
 kpiagidi po. ti go bua ki doagidi ki wani yi ke ti
 moko yama ye lien ni . ²⁰ Ti tiendi yeni kelima
 tii bua o ba kuli n sugi ki joagini ti yela, kelima
 laa todicianma po, yaa tuonli ke n gobidi leni i
 moamoani. ²¹ Kelima tii lingi yaali ñani O Diedo
 nintuali bebe ka, ama bi niba moko yaa nintuali
 . ²² Ti taani ki soani, bani leni ti kpiilo yua ke ti
 biigi yaama n kaa wa ki sua ke o pia li yankoali
 ke li go yaabidi ki pugini kelima o dugidi yi po n
 yaabi ki da maama. ²³ Yaali n tie Tita mo, o tie
 ti tuonsoanlielo leni ti ciánka yi kani. ti kpiiba
 yaaba n sieni mo tie a jandiena n gandi ki soani
 yaaba yi kani Kilisiti kpiagidi po. ²⁴ Yin waanba
 yin buaba maama a jandiena yaaba kuli nintuali,
 ke bani bi yaaba n bandi ke ti sa moamoane leni
 tin jigini ti yula maama bi nintuali kelima yi po .

Dianciamou 9

¹ Yaali n tie yi todima bi nigagidinjanba po, laa

tie tiladi min go diani yi. ² Kelima n bani yin pia yaa yankoali laa todima po. n pagi n yuli yi po, Maseduana yaaba kani ki waani ba ke hali jele ke Akayi yaaba wan cili ki bogini. yin pia yaa yankoali teni ke niba boncianla moko yaa yankoali fundi. ³ N soani ti kpiiba yi kani, kelima mii bua min den pagi yi maama kelima laa bonli po n tua fanma n bua ke ban sua ke yi bogini gbeni nani min den yedi maama. ⁴ Kelima mii bua Maseduana yaaba yaa ti yegi leni nni ban sua ke yii bogini gbeni; ti dugidi yi po n tua ti po fe, ki da yedi, i fe baa tua i yii. ⁵ Lan yaapo, n den laa ke li tie tiladi min mia n kpiiba ban ga liiga, ki gedi yi po ki cili kaa taaga yin den niani ke yi baa pa yaa todima. ban sua ke li bonli kuli bogini ki gbeni, lani n tie ban bandi ke yi puni leni yi pala kuli, ki laa tie leni yanbiidi ka. ⁶ Yin bandi mani yua n buli waamu, o baa yendi waamu, yua n buli boncianla mo baa yendi boncianla. ⁷ Yua kuli n teni nani wan jagi o pali nni maama ki da pa leni pabiili, bi, nani ban tieni yua u paalu yeni. ⁸ U tienu baa fidi ki teni yin gbie leni O ɿanbili ki yaa pia ke li dagidi o yogunu. ke li bonli kuli nni yin fidi ki kuani yi ɿantaadi, ki yaa go pia ke li yaabi kandi ki baa teni yin yaa tuuni a tuonjama. ⁹ Nani lan diani maama: «O den tieni mi ɿanma, o den todi a luoda, O teginma ye hali o yogunu kuli». ¹⁰ U tienu wan yua n puuni o kpakpaloo li bonbuli kaala, leni o bonjekaala, wanin n baa pa yi ki pugini ki teni yi bonbuli kaala n pili, o go baa pugini yi teginma bonluon kaala. ¹¹ Yi piama baa yabidi li bonli kuli nni yin

ba ki yaa puuni len ti bulcindi yogunu n kuli. ke yin suanti, tin teni yaaba yi todima yeni, baa tuondi U tien . ¹² Kelima yi todima baa kuani bi ni gagidiŋanba ŋantaado, li go baa teni niba boncianla tuondi U tien po n yabidi. ¹³ Ban la yin todiba maama yeni po, bi kpiagi U tien kelima yi waani ba yi tuoma Kilisiti labaaliŋamo tuonli nni; len yin puni bani, leni yaaba sieni kuli yi paabu leni yi pala kuli maama. ¹⁴ Bi bua yi lan teni ke bi jandi U tien yi po kelima wan puni yi yaa ŋanbicianli po. ¹⁵ U tien n ba i tuondi kelima o paabu yaabu n ki pia maama yeni po .

Dianciamou 10

¹ Mini Polo, mini n yaaba, n tundi yi kelima Kilisiti yumiili leni O dingimi po, mini yua n naani nni nidingi ka n yaa ye yi siiga, ama n yaa foagi leni yi n pia u palu. ² N miadi yi n yaa cua yi kani yin da teni min waani n palu. kelima li fidi min joagi n nialu yaaba yaa po n nuati nani ke ti cuoni leni nisaali yantiali yeni . ³ Ba len tin tie nisaala, ti moali naa tie nisaalimoali ka. ⁴ Kelima tin moa leni ya toatiadi naa tie o nisaali yaadi ka, ama li tie yaa toatiadi n pia U tien palu yu n fidi ki bolini yibalinba kanpaalu . ⁵ Ti guli mabanma buolu kuli leni yaa yantiajapaadi n kpedi ki fii pani U tien bandima po kuli. ti go cuo ki dadi yantiali kuli n tuo ki yaa ŋua Kilisiti. ⁶ Ti go bogini ki ba cuo yiema kuli, yi tuoma yaa dagidi cain yaa yogunu . ⁷ Yin nuanli mani bonjanla, ya nilo n tama ke o tie Kilisiti yua, wan bandi cain ke nani wan tie Kilisiti yua maama yeni, ti moko tie Kilisiti yaaba yo. li naa

pia n po fee ⁸ Ba, n yaa pagi n yuli hali ki ban pendi waamu kelima O Diedo n dini ti yaa bali, yaali n tie tin todi yi yin suagi liiga O sanjoadima nni ke laa tie yi bodima po ka . ⁹ Ke lan da tie nani n bua ki jieni yi leni min diani yi yaa tila ka. ¹⁰ Kelima bi nitianba tua: Polo maadi o tila nni leni u paalu, ama, o yaa ye ti siiga oo pia fidu ba kuli. o maama naa pia gbamanu ba kuli . ¹¹ yaabin yieni yeni n bandi li ne: tin foagi leni ki maadi yi yaa maama ti tila nni, ba ti yaa ye yi siiga ti ba yaa tie yene. ¹² Ti kan tuo bogini, bi, ki biigi ti yula leni bi tianba yaaba n ye yi siiga ki tendi bi yula po siedi, ki maadi bi yuceli maama ki biigidi bi ba leni nitoaba. baa pia yanfuoma . ¹³ tinba wani, ti kan pagi ti yula ki pendi ti banlu. ti ba sedi yaa banlu ke U tienu puogi ti ke tin soani. laa tuonli n yabidi ki pundi hali yi kani. ¹⁴ Ti kan pagi ti yula ki pendi tin tie yaaba nani tii pundi yi kani yeni, ama, tinba n kpa pundi yi kani leni Kilisiti labaalijamo . ¹⁵ Tii pagi ti yula ki pendi ti banlu, tii go pagi ti yula nitoaba tuonli po; ama ti bi sugini ke yi dandanli ti Diedo po n yaa pugidi, lan tie ti tuonli yi siiga moko n baa ki pugini ki lqua U tienu n bili ti po yaa banlu. ¹⁶ Ti go bi bua ba ki suagi liiga yi diema kandima ki waani o labaalijamo, kaa pagi ti yula leni nitoaba tuonli po . ¹⁷ Yua n baa pagi o yuli wan pagi o yuli O Diedo nni. ¹⁸ Kelima laa tie yua n tendi o yuli po siedi ka baa ba O Diedo moamoani saali, kali O Diedo n tieni yua yaa po siedi n baa ba wan sa o po yi moamoani .

Dianciamou 11

¹ Yi yaabi baa fidi ki juuni n po waamu leni n yanluoma yin juuni leni nni. ² Kelima n pia li ninponli yi po yaali n tie nani U tienu ninponli buolu yeni. kelima n bi niani yi ke n baa cayi leni joa yendo bebe, lan tie Kilisiti nani ya puowandiali n gagidi ki ɣjani cain . ³ Ama n jie ban da yaani yi yantiana yin ɣja Kilisiti yin ɣua yua yen payenli yeni. nani o wa n den buandi Awa leni o ninponbiadili maama yeni. ⁴ Kelima yaa nilo n cua yi kani ki wangt Jesu toa kaa tie tin wani yi yua, bi ke yi tuo ki ga fuotoama kaa tie U tienu Fuoma ɣjanma yaama ke yi den ga, bi labaalinjamo toa kaa tie yin ɣua yua, yi yen tuo ki ga li daano cangu . ⁵ N tama yaa tondiba n nua bi yula ke bi tie tondicianba yeni, baa cie nni leni ba. ⁶ Ba, n yaa bani liba mi maama nni, mii luo mi bandima wani. ti waani yi lan kuli yi siiga li bonli kuli nni . ⁷ Bi, nani n tieni tagile leni min jiini n yuli kelima n bua ki yugidi yi, min den cua yi kani ki waani yi U tienu labaalinjamo fanma kaa ga panpaani ba kuli yi kani yeni bii? ⁸ Kaanto yaa jandiena yaaba n kpaadi ban pia yaala ki todi nni ke n cua yi kani ki baa soani yi po. ⁹ yaa yogunu ke n den ye yi kani, ba leni min den luo bonli boncianla, mii tua o ba kuli po tugili, Kelima n kpiiba yaaba n den ɣnani Maseduna ki cua Kolinta, den puni nni yaali n den poadini kuli. li bonli kuli nni n den fidi kubi n yuli ka tua oba kuli po tugili. yene ke n go baa ba kubi n yuli . ¹⁰ Leni Kilisiti moamoani yii n ye n niini yeni yaapo, n yedi ke o ba kuli kan fidi ki yie n po ke n kan kpiagi n yuli li po Akayi diema

nni. ¹¹ Ki be yaa po? li tie ke mii bua yi bii? U tienu wan bani ke n bua yi . ¹² Min tiendi maama, n go baa yaa baa ki tiendi yene, kelima n bua ki sieni yaaba n ba li magbaali ki bua ka kpiagidi bi yula, ki go bogindi bi yula len tinba. ¹³ Laa niba tie tuofaatonda, yaa tuonsoanba n buandi bi niba ki kpali ke bi tie Kilisiti tonda . ¹⁴ Laa tie bonludi kaala kelima Sutani o yaa ba moko yen kpali ke o tie mi yenma Maleki. ¹⁵ Lan wani laa ludi ti o tuonsoanba moko ya kpali ke bi tie miyenma ya tuonsoanba. bi juodima baa tua nani bi tuona n tie maama . ¹⁶ N go yedi, o ba kuli n da nuanli nni nani ke n tie yanluodaano; lan yaaka tuo mani ke n tie yanluodaano, lan tie n moko n baa ki kpiagi n yuli waamu. ¹⁷ Min maadi maama ke n ba kpiagi n yuili yeni, tie papaadan maama yo, mii yedi ke li ñani O Diedo kani, ama n maadi nani o yanluodaano yeni. ¹⁸ Kelima li pia niba boncianla ke bi kpiagidi bi yula nani ñanduna yeni, lan yaapo n moko baa kpiagi n yuli . ¹⁹ Kelima yinba yaaba n tie bi yanfuodanba, yi tuo ki juuni leni bi yanluodanba. ²⁰ Yi yen fidi ki juuni leni ya nilo kpandi yonbi, leni yua dini yi, ki fie yi bonla, ki fali yi, bi ki pabi yi. ²¹ I fe pia nni leni min baa yedi yaala, tin den ye yi siiga ti den dingi, ki kan fidi laa bonla ama, o nisaalo n baa yuoo tien yaanli kuli, n maadi nani o yanluodaano yeni, n moko baa fidi ki tieni laa bonla . ²² Bi tie Ebulunba yaaba bii? n moko tie wane; bi tie Isaleelenba yaaba bii? n moko tie Isaleele yua; bi yaa tie Abalahama puolinjuanu yaaba n moko tie yene: ²³ bi yaa tie

Kilisiti naacenba, n maadi nani o yanluodaano yeni. n go tie Kilisiti naacemo ki cie ba; n cie ba a tuona nni, n cie ba ti puadi nni, n cie ba a kpaadidiena nni, u yogun tiama mii foagi leni mi kuuma . ²⁴ Taalima mu jufinba den pua nni pita n puadi yia. ²⁵ Taalimi Ta, bi puanni leni a gbabina, yenma bi madi nni a tana, taalimi ta mi ñincianma den baa je nni, mi ñincianma den tugi nni danmunli leni ku ñiagu ke ye mi niini. ²⁶ O yogunu kuli n sancena nni mii yen foagi leni mi kuuma, i kpeni nni, a sanjala siiga, mii den foagi leni mi kuuma n ma doguni yaaba siiga leni yaaba kaa tie jufinba siiga, mii foagi leni mi kuuma u dogu ciamu nni leni mi fanpiema nni, mi ñincianmi nni, n nagini mi kuuma kelima yaaba kpali ke bi tie Jesu yaaba po . ²⁷ N den ye a tuonjoaga nni leni fala nni, ki yen ye mi duanoanlima nni, mi koma leni u ñinñuulu nni, yogunu n kuli mi ñoalolima nni, ti wadi leni ti cadi nni. ²⁸ Mii cuadi ki taani leni bontiala; daali kuli n ye leni a jandiena yanyagidi. ²⁹ ñme n tadi ke n moko mii tadi lenio; ñme n ba ke laa ju n pali . ³⁰ Li ya tie tiladi min kpiagi n yuli n baa kpiagi n yuli kelima n tadingu po. ³¹ U tienu yua n tie O Diedo Jesu Ba, wan yua n pia ti pagidi hali yaa yogunu n kaa pia gbenma, bani ke mii pua faama . ³² Yaa yogunu ke n den ye Damasa dogu nni, o baciamo Aleta n den dini yua wan yaa gobidi u dogu den teni ke bi niba guu Damasa dogu bulñoana kuli ki baa cuo nni. ³³ Ama n kpiiba den teni ke n kua gu baabuogu nni ki balinin nni u dogu bilinciamu ke n baa ki jiidi niini ke n sani ki ciadi bi nuunni .

Dianciamou 12

¹ Naani n baa kpiagi n yuli lan yaa po; laa pia ñuadi ba kuli. ama n baa waani yi O Diedo bonle kaala leni O bondoagidi kaala. ² N bani Joayendo ke o tie Kilisiti ñoadi ka moala li pundi piiga n bina na, ke bi den duoni o hali tanpotuadi kaantaalu kani ama mii bani o den ye o gbanandi nni, bi waa den ye o gbanandi nni mii bani U tienu n bani . ³ N go bani ke laa joa, li den tie leni o gbanandi bi laa tie leni o gbanandi mii bani U tienu bebe n bani, ⁴ O den gedi ñalijani ki den gbadji yaa maama n kaa pia togida yaama ke o nisaalo kan fidi ki togidi. ⁵ N baa kpiagi n yuli laa nilo yaapo, ama n kan kpiagi n yuli n yucelipo, li yaa tie n tadingu po yaaka . ⁶ N yaa bi bua ki kpiagi n yuli, n kan bi tua nani yanluo daano kelima n baa waani i moamoani. ama n kan yedi li ba, kelima mii bua o baa kuli n jigini nni ki cie wan nua ke n tie yua bi wan gba ke n tie yua. ⁷ Ama, ke min da gbengidi n yuli leni ti japaadi kelima laa bondoagidi kaala n den pia ti kpiagidi maama yeni po, n yen gba n gbanu nni li bonla ke li muudi nni nani i konkoni yeni, li tie Sutaani Maleki ki yen muudi nni ke min da gbie leni ti japaadi . ⁸ Taalimi Ta n jandi ki mia O Diedo n ñani laa bonla n niini. ⁹ Ama O den yedi nni: N ñanbili dagidi a po kelima ku tadingun ne ke n paciamu yen tuuni bonjanla. lan yaapo, n go ba jigini n yuli ki cie kelima n tadingu po, lan tie Kilisiti paaciamu n yaa ye leni nni. ¹⁰ Lan teni ke n mangidi n pali ku tadingu nni, leni ti sugidi nni, leni fala buolu buolu kuli nni kelima Kilisiti po. kelima yaa yogunu ke n

tadi laa yogunu n yen sua ke n pa bonjanla .
11 N tua nani o yanluodaano kelima yinba teni
 ke n tua yeni. yinba n bi ηaa teni n po siedi
 kelima ba leni min ki tie li ba, yaa tondiba n
 nua bi yula ke bi tie tondicianba yeni, naa cie
 nni leni li ba. **12** yaali n waani ke n tie Kilisiti
 tondo moamoani, doagidi yi siiga. lan tie li juuli
 mi biigimi kuli nni, sinankeene leni li bonlidi
 kaala, leni mi bandicianma kuli den tiendi leni
 nni yi siiga. **13** N tieni be jandietoana yaaba po
 kaa tieni yi po; li yaa tie ke mii den tuo ki tua yi
 po yaaka? yin tieni mani n po sugili lan yaapo .
14 Diidi mani n go bogini mi taa tama ki baa cua
 yi kani, n kan go tua yi po tugili kelima mii lingi
 yi piama ka, ama yinba yi yaaba yo ke n linga.
 Kelima a bila ka baa taani li bonla bi danba po
 ama, bi bidanba n ba taani li bonla a bila po.
15 Mini n yaaba, n yama po n ba pa n piama ki
 go teni n yuli kelima yi naani po. n buama yi
 po yaa pugidi, naani li tie ke n bua yin wadi yi
 yaa buama n po ? **16** Min kaa tua yi po tugili
 yeni, bi tianba tua daalinba n tieni nunfanbu yo
 ki bua ki baa cuo yi. **17** Min den suani yaaba
 yi kani yeni, naani n den ten ke bi fie yi kani
 bonli ba bi? **18** N cedi Tita yegi leni ti kpiilo ke bi
 den gedi yi po, naani Tita den tieni yi u paalu ki
 den fie yi kani bonli baa bii? naani kuli ki cuoni
 leni yantiayenli leni sanyendu ka ? **19** Yi tama
 hali yogu, ke ti bua ki fuu ga ti yula yi nintuali;
 yen ka, ama li tie U tienu leni Jesu nintuali yo
 ke ti maadi. ti maadi yeni ki bua lan todi yi .
20 Kelima n jie n ya cua yi kani, min sua ke yii

tie min bi bua yin yaa tie maama, i moko n da sua ke tie yin kaa bi bua min yaa tie yua. N jie min da cua ki sua yi siiga kufugu, li ponli, leni li pabienli, mi paadima, leni i janbi, i kulinkundi ti japaadi, leni ti yanyagidi, i kulinkundi ti japaadi, leni yanyagidi. ²¹ N jie n cuama yi kani n Tienun da teni min lee i fee kelima yi po. N jie min da buudi kelima yi siiga yaabi n den ba ti tuonbiadi nni ki naa tuo ki lebidi bi pala ki mia sugili bi tuonjoagindi po, leni bi conconmi po, leni ban tieni yaa cagindi buolu kuli .

Dianciamou 13

¹ Min baa cua yi kani yaama nne n tie mi tataama. maama kuli ba kadi siedinba lie bi siedinba ta ñoana nni. ² Mi ta liema min den cua yi kani yaa yogunu, n den kpia yedi, ba leni moala min kaa ye yi siiga n go yedi ke, yaabin den kpia tieni ti tuonbiadi leni yaaba n sieni kuli, n yaa gua cua i kani, n kan cedi o ba kuli . ³ Kelima yi lingi yaali n doagidi waana ke Kilisiti maadi ñoabu nni. wan yua n kaa tadi ama o pia u paalu yi siiga. O den ye leni ku tadingu ban den kpa O li dapuanpuanli po ya yogunu. ama O ye ki fo leni U tieni paciamu. ⁴ Ti moko taani leni O, O tadigu nni ama ti fo leni O kelima Utienu paciamu po. lan tie tin tuuni ya tuona yi siiga . ⁵ yinba yi yaa ba, yin kpagi yi yula nni ki lee yi yaa ye li dandanli nni. biigi mani yinba yi yaa ba yi yula. yii bandi ke Jesu Kilisiti ye ti niini bi? li yaa sua ke poadi ye yi niini yaaka. ⁶ Ama n tama yi ba tuo ke tinba wani naa pia poadi o ba kuli . ⁷ Tinba wan miadi Utienu ke yin da tiendi

yaa bonli n bia. laa tie ke ti bua ki waani ti yula
 ke tii pia poadi o ba kuli ka ama, li tie ti bua yin
 yaa tiendi yaali n ñani, ke ti mo n tua nani yaaba
 n pia poadi yeni. ⁸ Kelima tii pia yaa palu n baa
 yie i moamoani po ama i moamoani ya palu bebe
 . ⁹ Ti mangidi ti pala ya yogunu ke ti tadi ke yi
 mo pa; lan wani tin miadi yaala ti jandi nni li
 tie ke yin yaa suagi liiga ki be li dandanli nni.
¹⁰ Lan yaapo n teni ke n diani yi laa bonla ba
 leni min ki ye yi siiga; lan tie n yaa ti cua yi kani
 min da mabini yi leni O Diedo n dini nni ya bali
 yi ñamu po ki laa tie yi bodima po . ¹¹ Moala n
 kpiiba, yin yaa ye li pamanli nni. moandi mani
 ki yaa suagi liiga ki be li dandanli nni, yin yaa
 baagidi i yaba, yin ya pia yantiayenli, yin yaa
 ye leni mi yanduanma, lani n tie mi buama leni
 mi yanduanma Tieu n ya ye leni yi. ¹² Gobini
 mani yi leni i fuondi . ¹³ U tienu nigagidinanba
 kuli fuondi yi. ¹⁴ O Diedo Jesu Kilisiti nanbili leni
 U tienu buama leni, U tienu buama, leni Utieu
 Fuoma Yua taayienu n yaa ye leni yi kuli !

Bible Gourma

**The New Testament in the Gourmanchéma language
of Burkina Faso, Niger, Benin, and Togo**

**Le Nouveau Testament en langue Gourmanchéma du
Burkina Faso, du Niger, du Bénin et du Togo**

copyright © 2020 Door 43 world-wide mission community

Language: Gourma (Gourmanchéma)

Dialect: Central

Translation by: Door 43 world-wide mission community

Contributor: Gourmanchema, Wilson, gux4-ner, Jean Sandamba, Ouoba K. David, Parfait-Ayanou

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2022-06-16

PDF generated using Haiola and XeLaTeX on 11 Nov 2022 from source files dated 17 Jun 2022

1168f00b-eabf-5a7b-9fed-4d2120867558